

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839**

**O LE SULU SAMOA**

**APERILA 2024**

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 29 - website: [www.cccs.org.ws](http://www.cccs.org.ws)

***APERILA LE MASINA O OSIGA FEAGAIGA***



***Koroseta FS & Maria Semau @ Falealupo***



***Martin FS & Rosalote Taumate @ Manunu***



***Faafetai FS & Tamara Nepo & Aiga @ EFKS Westside, Kuiniselani***

# **FAASINO UPU**

1. O LE LAUGA	2
2. OSIGA FEAGAIGA IA APERILA	5
3. NA O AFIGA E TULEI MAI	7
4. O LE PEROFETA MULIMULI	8
5. O E UA FAI I LAGI FOLAUGA	12

## **O LE LAUGA (1)**

Tusi Faitau: Failauga 2:3-11; Filipi 3:4-11.

Matua: Filipi 3:7 – “*Ae peita’i o mea uma sa aoga ia te a’u, ua ou manatu ua le aoga ia mea ia te a’u ona o Keriso.*”

Manatu Autu: **O IESU KERISO LE OLA O LE LALOLAGI.**

### Faatomuaga/Introduction:

Fai mai se tasi o Tusitala ta’uta’ua mai Peretania e suafa ia Shakespear: “O le olaga lenei ua na o se ata tifaga e faasolo mai i lona amataga, ona mou atu lea pe uma foi, ma ua le toe manatuaina lava.”

### Feagaiga Tuai/Old Testament:

Fa’apea se manatu o le Tusitala o Failauga pei ona faailoa mai. Ua manatu o ia, o mea uma na ia maua i le olaga nei, ua leai se aogā, ma e matuā fa’atauva’a lava ia, ma le ‘ai a le matagi. E mafai ona tatou faapea ane, o le Failauga ua i ai se fa’aletonu i lona mafaufau, auā o le upu moni, e matuā fesiligia ma fete’ena’i lea tulaga i lo tatou olaga nei, i le leai o se mea aogā, ma ua avea ai lenei manatu, e fa’avaiva’ia ai le ola sa’ili o ē o lo’o saili manuia mo aiga, nuu, malo aemaise lava le Ekalesia mo le lumana’i mo a taeao. E le gata foi i lea, o ai se tasi na te fia ta’uvaleaina i lenei olaga, o lo’o sapi ai le tagata i le tele o fa’amanuiaga mai le Atua.

A e peita’i a tatou toe vaai toto’a ma le manino i le manatu o le Failauga, faatasi ma lona ta’ufa’atauva’aina o mea uma o le olaga nei, ona tatou iloa manino ai lea, ua mafua ona ia

ta’ufa’atauva’aina, ona e ese le mea o lo’o aga’i i ai lana sa’iliga. O le mea moni la o fia maua e le Failauga, o se mea aoga, a e fa’avavau. O se mea e fa’amalieina ai, e tumau e o’o i le faavavau, e le mavae ma mou ese atu.

O lona uiga la, e le fa’aletonu le mafaufau o le Failauga e pei ona manatu i ai a o le tagata o loo taula’i lana taga’i i tua atu o le olaga nei. O le a la le mea moni o loo fia maua e le Failauga?

### Feagaiga Fou/New Testament:

O le mea moni lea o loo tali mai ai le Aposetolo o Paulo i lana tusi i le Ekalesia i Filipi. Fai mai a ia: “*A e peita’i o mea uma sa aoga ia te a’u, ua ou manatu ua le aoga ia mea ona o Keriso.*” “*E moni lava o lo’u manatu ua le aoga mea uma lava ona o le silisili ese o le poto i la Keriso Iesu lo’u Alii; ona o ia ua ou faaleaogaina ai mea uma, ma ou manatu o otaota lava ia mea, ina ua ou maua Keriso.*”

Ioe, o le mea lena na fia maua e le Failauga, o Iesu Keriso le mea aoga silisili e fa’avavau. O Iesu Keriso o le ola moni o le lalolagi. Taumafai le Aposetolo o Paulo e faamatalaina i lona olaga, i le mea na maua ai o ia e Keriso, aemaise lava ina ua ia mauaina le Alii o Iesu Keriso. Fai mai Paulo, afai tou te finau mai ona o lo’u sauā i nisi auaua a Iesu Keriso, ou te le’i faia fua, a e ona o lo’u maelega i le tulafono ma tapua’iga a Iutaia, auā o a’u o le Faresaio, o le Eperu foi o sã Eperū. A e ui o lea, ua fa’aalia mai e le Keriso le mea moni, lea ua ou molimauina i le ala i Tamaseko. “*O a’u o Iesu ua e sauā mai i ai.*”

Ta’utino le Aposetolo ma lona mautinoa ua na o Iesu Keriso e atoatoa ai lona mana’o. Fai mai o ia: “*Ua le o toe ola a’u, a o Keriso o lo’o ola i totonu ia te a’u.*” Le Keriso na te fa’amalieina o tatou mana’o i mea lelei uma, ma e tumau pea, e o’o i le fa’avavau. Le Alii o Iesu Keriso e maua ai le olioli loloto, auā o ia o le ola moni o lenei lalolagi.

### Faatatau/Application:

Le fanau e a le Atua, o Iesu Keriso o le ola moni o lenei lalolagi. O ia tatou te maua ai le malosi i le tino. O lona uiga, o le tausiga o lo outou soifua ma si o tatou ola i le tino, ua saunia e le Atua ma foa’iina mai e ala ia Iesu Keriso. Le au pele e, o le a ea le uiga o lenei olaga? Ioe, o le olaga lenei o le olaga o sa’iliga, tauiviga ma tausinioga, ma

e mana'omia le taumafai malosi e galue, ma le fa'amaoni, ina ia manuia taumafaiga i le taimi nei ma le aga'i atu i le lumana'i, auā le galuega a le Atua.

'Aua ne'i galo, ina ne'i taotao pito tasi lau sa'iliga, ona gata ai lea i mea e mavae ma mou atu, a e galo ai le mea tāua e fa'avavau, e gata ai foi lou mana'o i mea uma, auā o le a ia faamalieina lou mana'o i so'o se mea lelei, i so'o se taimi i lou ola i le tino, a e sili ai lou ola faaleagaga.

"O Iesu Keriso o le ola moni o le lalolagi." Na ia fetalai; "*Ia outou mua'i sa'ili le Malo o le Atua ma lana amiotonu, ona maua fua lea o isi mea uma.*" O ia lava lenei na ta'ufaatauva'aina ai e Failauga mea o le olaga nei, ina ia maua o Ia, a e ta'utino ai le Aposetolo o Paulo ina ua na mauaina: "*Ua ou manatu ua le aoga mea uma ona o Keriso, ona o ia ua ou faaleaogaina ai mea uma, ma ou manatu o otaota lava ia mea, ina ua ou maua Keriso.*"

#### TauaalugaKerygma:

"Ioe, o Iesu Keriso o le ola o le lalolagi." Lena o lo'o outou soifua ai, le ola e ui ina sa'ili gatā, a ua faafaigofieina mea uma; ina ua uma ona asaina e Iesu Keriso ala o puapuaga, i lona maliu ma lona Toetu manumalo, nei e o'o i le fa'avavau. Amene!

### **Saunia Susuga Peteru Fiaumi Taula FS**

#### **EFKS Lepale**

#### **Matagaluega MALUA**

## **O LE LAUGA (2)**

Tusi Faitau: Luka 24:1-9

Matua: Luka 24:5 - "*Se a le mea ua outou saili ai lē ua soifua i ē ua oti?*"

Manatu Autu: "**O ai o lo'o outou sailia?**"

O le Aso Sa o le Eseta e faamanatuina ai e Kerisiano uma o le lalolagi, le toe soifua manumalo o Iesu Keriso mai le oti ma le tuugamau. I le taeao segisegi lava, fai mai le molimau a Luka, na ala usu ai fafine e ave mea manogi e asi ai le tuugamau. O se mea uiga ese na latou vaaia i lona taeao. O le ma'a sa pupuni ai le gutu o le tuugamau ua fulieseina, ua lē o i ai le tino o Iesu i totonu o le tuugamau. A ua faate'ia i latou, ina ua tutū mai agelu ma faapea mai,

*"Se a le mea tou te saili ai le ua soifua i e ua oti? E lē o iinei o ia, a ua toe tu mai o ia nai le oti ma le tuugamau."* (ff.5-6).

E le'i manatu tinā na ala usu i le tuugamau, o le a faafeiloa'i mai i latou i se tala fiafia i lenā taeao. E le'i manatu foi i latou o le a taunuu folafolaga a Iesu, lea sa faailoa atu ia i latou a o soifua ma ola i le lalolagi. O le upu moni, na ō ma le loto faanoanoa ma loimata maligi, ona ua motusia le mafutaga ma lo latou Matai. Na ō ma le lē iloa, o le a suia atoa le faasologa o le tala faasolopito - ina ua maua le tala ua toe tu Iesu. E lē tioa a fai mai upu a le atunuu: 'E au le ina'ilau a tinā' - aisea? Auā, o tinā na latou mua'i molimauina le toe tu o Iesu. O tinā foi na latou mua'i tala'iina le tala i le toe tu manumalo o Iesu.

O le Keriso na afio mai i le lalolagi ina ia maliu. Auā, a lē maliu, e le pa'i i lona mamalu. O lona toe tu manumalo nai le oti ma le tuugamau, o le ata manino lenā o le faataunuuina o fuafuaga loloto a le Atua, e pei ona fetalai le Alii i luga o le Satauro, "*Ua Taunu'u*" .... O le fa'aolataga mo le lalolagi, lea ua taunuu. Ua taunuu le tulafono a le Atua na tu'u ia Mose; ua taunuu valoaga a le 'au perofeta; ua taunuu foi le mavaega ma Aperaamo: "*E manuia foi ia te oe atunuu uma o le lalolagi*" (Kenese 12:3).

Pe lē o le uiga loloto 'ea lea o le Eseta o le toetu? O lea ua toe soifua mai Keriso nai le oti ma le tuugamau; o le fiafiaga tumau lea ma le olioli e faavavau o le fanau faatuatua a le Atua. "*Auā, ua tuuina mai ia Keriso le pule uma lava, i le lagi ma le lalolagi. O lenei, inā o atu ia e fai nuu uma lava ma so'o; ma papatiso atu ia te i latou i le Suafoa o le Tamā, le Alo, ma le Agaga Paia*" (Mataio 28:18-19). O le poloaiga lenā ina ia tala'i le Tala Lelei, o le tala i le togiolaina ma le toe faatula'iina o le tagata to'ilalo i le leaga o le agasala.

Ioe, le au uso e! Ua lē o toe i ai la se tui o le oti; ua lē o toe manumalo foi le tuugamau, auā o lea ua tala'i mai le manumalo o Keriso. Ua tuufua ma taaligoligoa le tuugamau; ua matata'u le 'au soo ma i latou na matamata ai ina ua leai se tino maliu o lo latou Alii. O i latou ia sa aupito sili ona latalata ia Iesu; o i latou ia sa tataua lava ona muamua talitonu ma faatuatua i lana galuega faaola. A e peita'i, ua lē faapena loto o le 'au

so’o. Ua vave lava ona liusuāvai le faatuatua ma le talitonu i le Alii, ina ua motusia le mafutaga. Ua fememea’i o latou loto ma ua lē mautonu, ina ua le vaايا le tino maliu o Iesu. O le faailoga lea o le leai o se loto talitonu, e lē lava foi le faatuatua, i le tele o a’oa’oga ma poloaiga a le Alii a o mafuta vāvālalata ma Iesu.

Le ‘au faafofoga ma faitau i afioga a le Atua: A e faapefea i tatou? O fea o loo tatou saili ai le Alii i lenei Eseta o le 2024? Ua lē tatau ona tatou toe fesiligia pea le moni o le Toetu mai o Iesu, faapei o le ‘au so’o loto masalosalo ma faalotolotolua; ua lē tatau foi ona saga masalosalo pea ma faalotolotolua i la tatou auaunaga i le Atua ma lana Ekalesia. Ua fetalai Iesu, “*O a’u nei le ala, ma le upu moni ma le ola, e lē alu atu lava se tasi i le Tamā, pe a le ui mai ia te a’u. [Ioane 14:6].....*” *“O a’u nei le toe tu ma le ola, o lē faatuatua mai ia te a’u, e ui lava ina oti, a e ola lava ia. [Ioane 11:25]..*” *“Ua ou sau ina ia outou maua le ola, ia maua atili ai lava” [Ioane 10:10].*

Afai ua fetalai Iesu o ia o le ala, toe tu ma le ola, aiseā la tatou te masalosalo ai ma faalotolotolua pea? Aiseā tatou te so’ona saili ai pea Iesu i le tuugamau tuufua - o le nofoaga e leai se ola o i ai? Fai mai le fesili ua fai ma autū o le lauga, ‘O ai o loo outou sailia?’ Ou te manatu, e mafua ona saili solo le tagata, ona o loo fia maua se vaifofō i ona faafitauli o loo feagai ma ia. Ua taatele i nei ona po le sailiga o le manuia o tagata i aso fai soo i le Bingo. E ‘bingo’ mai lava i le Aso Gafua e oo i le Aso Toonai. A o isi ua saili vaifofō i fualaa faasāina ma le ‘ava malosi; o nisi foi, ua saili i le gaoui ma le talepe fale. O le faalavelave o na sailiga uma, e lē maua ai se vaifofō, a e na o le ola fālōlō. Ua faaopoopo ai isi faafitauli i luga o isi foi faafitauli.

A e o faapefea mai lau sailiga ia IESU? O le lu’i po’o le faamanatu mo i tatou i le Eseta o lenei tausaga, le au uso e, aua ne’i o tatou toe saili solo le Alii i mea e lē aogā. O isi na auala e iloa ai le tagata o lo’o masalosalo pea ma faalotolotolua i le Toetu o Iesu. E lē tatau ona tatou toe so’ona sailia le Alii i mea e leai se faalaina o i ai. Ia tatou galulue ma tautua i le finagalo o le Atua, e faapei ona laugaina i lea

Aso Sa ma lea Aso Sa. O le Maliu ma le Toetu manumalo o Iesu, o le fa’aalia lava lea o le alofa mutimutivale o le Atua mo lana fanau uma i le lalolagi. O le alofa mutimutivale lenā o le Atua, na liutino tagata ai ma tu’ua lona mamalu, a e afio mai i le lalolagi e mau faatasi ma ona tagata; e tiga faatasi, pologa faatasi, ma oi faatasi ma lana fanau. Aisea? Ina ia tatou maua le ola; ina ia tatou maua le fiafia; ia tatou galulue faatasi ma ia nonofo felagolagoma’i i le fealofani.

E lē tāua le tele o upu ma tala, a o le faatino e ala i la ta auaunaga i le Atua - o le mea aupito sili lena ona tāua. O iina foi e iloa ai lou tagata moni, e iloa i au galuega lelei. Ia faatino lou alofa moni i lau auaunaga ma le faamaoni, i le mea e gata mai ai lou malosi – ia fai mea lelei ma mea sili mo le Atua ma lana galuega. ‘Aua le faalogologo tiga, ‘aua le faavaivai ma solomuli gofie i mea e fai. Ia finau ma tauivi, onosa’i ma faamalolosi i le galuega a le Alii.

O Keriso lava ia, e le gata i lona folafola atu o le finagalo o lona Tamā, a e na ia onosai ma faatino le moni o lona alofa ia i tatou i luga o le Satauro. O le sailiga o le tatou faaolataga e le’i faigofie; auā, na saili lava i lona soifua ofoina atu atoa. E ui lava o auala o tiga ma puapuaga, inosia ma amusia e tagata, a e na ia onosa’i lava ona o lona alofa ia te oe ma a’u ma i tatou uma. O le sailiga e le’i mafai e le tui o le oti ma le malosi o le tuugamau ona taofia: Ua Toetu manumalo mai i le aso tolu. Ua afio i le lagi, a e auina mai le Agaga Paia e fai ma o tatou fesoasoani sili, e tauto’aluaina lo tatou vaivai. O le Agaga lea tatou te malolosi ai, tatou te lē fefefe ai e ta’u le mea moni.

Tatou te le toe faavaivai ai pe solomuli gofie i la tatou auaunaga i le Atua. Auā, o ia lava na fetalai, “*Ou te le tu’ua outou o matua oti, ou te alu, a e ou te toe sau ia te outou*” (Ioane 14:18). “*Auā, e tatau ona tiga le Keriso, ma toe tu mai nai e ua oti i le aso tolu*” (Luka 24:46). Ona o Iesu, Amene!

**Saunia Susuga Peteru Fiaumi Taula FS**  
**EFKS Lepale**  
**Matagaluega MALUA.**

---

# **OSIGA FEAGAIGA I LE MASINA O APERILA**

## **1. EFKS MANUNU**

O le Aso Faraile 12 Aperila na faataunuu ai le osiga feagaiga a le EFKS Manunu, ma lo latou faifeau susuga Martin Aokuso Taumate FS ma le faletua ia Rosalote Li'o Foleni Taumate. O le susuga Vaigalo Maua FT le toeaina o le Pulega Anoamaa, na taitai le sauniga ma osi le feagaiga. O talosaga na saunia e Onosa'i Soo FS (Saoluafata), o le Tusi Paia na faitauina e Sakaio Maiava FS (Lalomauga), o le lauga mo le Ekalesia na saunia e Tau Toleafoa FS (Falefa), a o le lauga mo le faifeau & faletua na saunia e Tafaigata Galumalemana FS (Falevao). O le afioga Tupuola TK na fai ma sui o le Aulotu e molimau e tusa ma la latou faiga filifiliga, ona tali fuaitau foi lea o le faifeau e tusa ma la'ua filifiliga i le talia o le valaau atu a le Ekalesia. Sa le'i umi se taimi sa faia ai lea finauga i le talia pe leai, aua talu ona i'u mai Malua, o le naunautaiga lea o le loto ia vave ona galulue i le galuega faafaifeau tausii nuu. E faafetaia ai le Aulotu i la latou faatofalaiga ua faitaulia ai lo la'ua faatauvaai i lo latou finagalo. Na ia faafetaia foi le tapuaiga a matua ma aiga sa nofo tatalo mo ana tama fanau. Na ta'ua foi e Martin le faafetai i le Ekalesia Aoa o ala i le alii pule ma le Komiti Faamisionare o vaaia le EFKSTV, mo le avanoa sa faigaluega ai a o faatali so la'ua nuu.

O le afioga Taitaifono Fono Tele, susuga Esera A. Esera FS, ma le Taitaifono Komiti Au Toeaina susuga Asotasi Gu Time FT, Toeaina galulue ma Toeaina Penisione, sui o aiga ma sui o le EFKS Manunu, sa fai ma aao taumatau o le Ekalesia e faamaonia ma faamanuia e ala i le aao faatalofa atu i le faifeau ma le faletua. Na auai e molimau Toeaina ma le aufaigaluega faifeau ma latou faletua o le Matagaluega Apia Sasa'e faapea le Matagaluega Faasaleleaga. Sa auai foi le mamalu faalemalo, o aiganalua ma paaga a le auga o aute o lea aso. Sa silatoga foi le ta'ita'i o le sauniga ma le faapotopotoga i le o le feagaiga na saunia e le Aulotu i Manunu, ma le Ie sa faaigoa 'O le Tapuaiga a Aiga' na saunia e aiganalua. Na tauluga le sauniga i le Sakarameta o le Faamanatuga na taitai e Rev Martin. Na faai'u le aso i talisuaga, fa'aaloaloga ma osiga taulaga lea sa tu tootoo ai le tofa Manu Maugatai, o le sa aveva muamua ma Tiakono Toeaina Apia Sasa'e.

## **2. EFKS FALEALUPO-UTA**

O le osiga feagaiga a le EFKS Falealupo uta ma lo latou tofi le susuga Koroseta Semau FS ma le faletua ia Maria, sa faia foi lea i le Aso Faraile 12 Aperila. O le toeaina o le Pulega Itu Asau, susuga Amuia Seuala FT (Failautusi Komiti Au Toeaina) na taitaiina le sauniga paia ma le mamalu. O le faitauina o le Tusi Paia ma le Lauga na saunia e le susuga Toese Tuia FS (Sataua), a o talosaga na taitaiina e le susuga Motusaga Lesa FS (Auala). O sauniga nei e masani ona faatumulia i le paia o le aufaigaluega o le Pulega, le Matagaluega ma le Ekalesia Aoa o ala i le mamalu faalemalo i le afioaga ma le itumalo, faapea le mamalu o aiga na lua, o uo ma aumeamamae ma e masani.

O le faasologa masani o le sauniga e molimau ai le sui o le Aulotu i la latou faiga filifiliga, sa faalagolago i le fesoasoani mai o le Agaga Paia, na faamaonia e le susuga Toeaina ma le Failautusi. Na molimau foi le susuga i le faifeau i la'ua filifiliga e talia le valaau, e tusa ma le faasinoga a le Agaga, aua o le auga lea na a'otauina ai i Malua mo tausaga e 4. Sa ia tautino foi le nofo sauni e fai le galuega ma le faalagolago tasi i le taitaiga a le Alii e ana le galuega, ma le faamoemoe o le a galulue faatasi ma le Aulotu e ati a'e le Ekalesia a Keriso, mo le faaolaina o agaga, o le manuia o le soifuaga, ma ia i'u mea uma i le viiga o le suafa mamalu o le Atua. Na faafeiloai alaoaia ma faamanuia foi, e fai ma sui o le Ekalesia Aoa o ala i le Matagaluega ma le Pulega ma le Aulotu, nisi o Tama o le Ekalesia ma le nuu sa auai. Na faai'u foi le aso i le folasia o le o Feagaiga, faapea tausamiga fiafia ma osiga taulaga e ala i fa'aaloaloga masani.

O le susuga ia Koroseta na i'u mai Malua i le tausaga 2018, ona galue lea i le EFKSTV i le 2021, ma faau'uina ai i le tofi Faifeau Samoa ia Me 2023. O ia o se lupe faalele a Saleaula, Leauvaa, Patamea, Fusi Safata; a o le faletua ia Maria o se taulaga talosia a Mulifanua, Lano ma Asaga. Ua la'ua fa'auau le galuega i le EFKS Falealupo uta, ina ua malolo penisione mai le susuga Leama Faletoese FS ma le faletua ia Salomina i le Fono Tele ia Setema 2022. Ia faamanuia tele le Atua i le galuega ua valaauina ai, ma ia viia Lona suafa e faavavau.

---

### **3. EFKS WESTSIDE, KUINISELANI.**

O le osiga feagaiga a le EFKS Westside, Pulega Purisipeni Sisifo, Matagaluega KUINISELANI i Ausetalia, ma lo latou faifeau fou ia FAAFETAI NEPO FS ma le faletua ia TAMARA na faia i le aso 20 Aperila. O le Toeaina o le Pulega Purisipeni Sisifo, susuga Petaia Tuifao FT na taitai le sauniga mamalu na auai ma molimauina e le afioga Taitaifono Fono Tele susuga Esera Auatama Esera FS ma le faletua ia Tamara Esera, faapea le mamalu sa'o o le Pulega, le Matagaluega tainane le Ekalesia Aoao, o le paia o aiga e fia o le Faifeau ma le Faletua, o uo ma aumeamamae i Ausetalia ma e na malaga mamao mai Samoa.

O le Tusi Paia na faitauina e Tavita Evagelia FS, o talosaga na fofogaina e Falepau Tuiluga FS, o le Lauga mo le Faifeau ma le Faletua na saunia e Lance Alaimona FS a o le Lauga mo le Aulotu na faia e Petaia Fuimaono FS. O le susuga i le A'oa'o Fesoasoani ia Toaiga Paese AF sa fai ma sui o le Aulotu e molimau i la latou filifiliga, ma ta'utino lo latou nofo sauni e tautua ma galulue faatasi ma lo latou tofi.

O i latou na valaaulia e faafeiloa'i aloa'ia, faamanuia ma ofo alofaaga mo le faifeau ma le faletua, e aofia ai le afioga Taitaifono Fono Tele, Esera Auatama Esera FS, faatasi ai ma Toeaina o Lauie Lupematasila FT, Simona Avaia FT, Petaia Tuifao FT, Laufiso Taua TT, le Laulau a le Pulega Asora Faresa FS ma Henry Ito FS, o Ape Sofara TT fai ma sui o aiga, o sui o le Aulotu ma le au mau tofi o le sauniga. O Faafetai o se alo faasino i le susuga Mani Nepo FS & Sareta mai Fatuvalu, Faatoia, Fagalua ma Afega, a o le faletua ia Tamara o se taulaga soifua a Fetui & Momotu Aloiai ma aiga mai Vailoa Palauli ma Sapapalii. Na i'u Faafetai mai Malua i le 2021, galue o le Ofisa Kuiniselani i le MAK, faaipoipo ma Tamara ia Ianuari 2023, ua faamoemoe aulia le Fono Tele ia Me 2024 ona faau'ua lea i le tofi Faifeau Samoa. E lua IE o le Feagaiga, o le tasi na saunia e le EFKS Westside ma le isi na saunia e aiganalua. Na taulaga le sauniga i le Sakarameta o le Faamanatuga, o le saunoaga faatama a le Toeaina Faatonu o le Matagaluega, ona alo ane lea i osiga taulaga e ala i tausamiga ma fa'aalologa. Ia manuia le galuega.

---

### **4. EFKS MORAYFIELD, KUINISELANI.**

Sa faapea foi ona osia le feagaiga a le EFKS Morayfield, Pulega Purisipeni Matu, Matagaluega KUINISELANI Ausetalia, ma lo latou faifeau le susuga VAASAUMAMA O LAFAAUA SI'AFS ma le faletua ia ELISAPETA, i le aso 6 Aperila 2024. O le susuga lava i le Toeaina o le Pulega, o le Toeaina Faatonu foi lea o le Matagaluega Kuiniselani, susuga Lauie Lupematasila FT na taitai i le sauniga mamalu, na faatumulia i le aufaigaluega Toeaina ma Faifeau ma Faletua, o aiganalua malaga mamao mai Samoa, o uo ma aumeamamae. O le faasologa masani o le sauniga e pei ona faatonuina mai le Tusi Failotu a le Ekalesia, IA VIIA LOU SUAFA, ma taulaga ai i le Sakarameta paia o le Faamanatuga, a e faaiu i le feagaiga faaleatunuu e pine faamau i IETOGA. O Vaasaumamao ma Elisapeta ua sui nei ia Ioane & Silaumua Aloalii FS na penisione i le 2023. Ia faamanuia le Atua i le galuega.

### **5. EFKS SAVALI O LE FILEMU, AMERIKA.**

O se tasi osiga feagaiga ua faamaonia sa faia i lenei vaiata, o le Aulotu lea o le EFKS SAVALI O LE FILEMU, i le Pulega i Matu o le Matagaluega Amerika, ma le susuga SELULO LAGOO FS ma le Faletua ia VAIOLA. O le Aulotu leni e i totonu o le aai o Las Vegas i le setete o Nevada, Amerika. Ua atoa ai le 4 o Aulotu i leni Pulega, o loo taitaiina e le Toeaina susuga Saitumua Tafaoialii FT ma le faletua ia Rosa, o tausia le Aulotu EFKS Magna, i Utah.

O le susuga ia Selulo Lagoo FS ma Vaiola sa avea muamua ma faifeau o le Aulotu EFKS Laau o le Ola i Leemore, ma o le Toeaina o le Pulega San Francisco. Na faamavae i la'ua ma tapunia ai le Aulotu ona ua leai ni tagata ma aiga lotu. Na faia ai le iuga a le Komiti Au Toeaina ina ia aloaia le tuueseina o le tofi Toeaina, ma le tapunia o le Aulotu Laau o le Ola, faapea le Pulega San Francisco. O isi aulotu sa i ai na tuuina atu i le Pulega i Saute i le vaaiga a le Toeaina Makerusa Porotesano FT. Mulimuli ane, ona osia lea o le feagaiga a le EFKS Savali o le Filemu ma le susuga Selulo & Vaiola Lagoo FS. Ia manuia.

---

## NA O AFIGA E TULEI MAI FOFOGA O LE ALII

### MALUTIA MAI AFĀ O LE OLAGA.

“46 Se a ea le mea e ta’ua ai a’u e outou, Le Alii e, le Alii e, a e tou te le faia mea ou te fai atu ai?” Luka 6.

E te manatua le Pese Aoga Aso Sa, *Tagata poto na fau lona fale i luga o le papa... Tagata valea na fau lona fale i le oneone..?* Na agi mai le afā taia ai fale uma e lua, na pa’ū le tasi a e na tu pea le isi. O le a’oa’oga a Iesu mai leni faataoto, e lē na o se fautuaga i le sili atu o le poto nai lo le valea. O le upu moni, o tatou uma e tele taimi e popoto ai, a e valea foi i le tele o nisi taimi. Na te le’i fai mai foi, o le fale na tu o le maota lea o le tagata faatuatua, a o le fale na pa’ū o le laoa lena o le tagata faapaupau. Pe faapea foi na Ia a’oa’o mai o le tagata toaga i lotu na malosi lona fale, a o le tagata e lē lotu na solofa i lalo lona fale. E sili atu ona faigofie lana mataupu, a e sili atu foi ona ogaoga.

Pe afai e oo mai faafitauli o le soifuaga, o puapuaga ma mafatiaga eseese e tulei i tatou seia oo ina pipii o tatou papatua i le puipui, ua taumatemate le isi laasaga pe aulia le isi minute, pe afai e mātūtū uma punavai o tatou faamoemoega, e lē o so tatou poto ma se atamai, e lē o so tatou faaolaina, po o so tatou toaga i le lotu na te aveina atu i tatou ia sao atu i matagi vale o le soifuaga. E ui ina o nei laasaga o le olaga faa Kerisiano o mea e aogā ma tāua, o faamanuiaga tatou te viia ai le Atua, peitai e toatele tagata atamamai ma popoto, tagata faatuatua ma fīfīa e lolotu ma tapuai, latou te gogoto ifo pe a afatia i matagi o le soifuaga: o mafutaga ma feagaiga motusia ona ua lē faamaoni le alofa o le tasi i le isi, o mataupu tau tupe ina ua faula’i aitalafu, o gasegase lē matogafitia ma le oti o fanau pele o tofi mai le Atua, faalavelave tutupu faafuase’i e le’i mafaufauina ma suia ai siosiomaga o aiga ma galuega.

O le faamamafa foi a Iesu e lē o se augani ina ia faateleina le iloa ma le malamalama i ana afiga paia. E tau fai manino tagata uma sa nofoia fale e lua, i le Upu a le Alii. Peitai o le fai atu, “*Le Alii e, ou te ioe ma amene e sa’o ma moni lau afiga*”, e lē lava lena e faasaoina ai oe ma lou fale mai le matagi ma le afā. O le autu ma le aano

tonu o loo fia ta’u mai e Iesu iinei, o lo tatou *faia* lea o mea tatou te faalogo atu o Ia fetalai mai ai, o le auala lea tatou te saogalemu atu ai mai totonu o afā! Ua tonu i le finagalo o le Atua e faamamalu faaaloalogia ma faataua lana Upu, ma o lo tatou usitai ma tausi i ai ma faia, o le a faapea foi ona faapipii i ai ma i tatou, ma o le a faapea foi ona faafaigaluegaina lona mana e fai ma sui o i tatou. E tāua le valaau atu, tautala atu, ta’uta’u atu le suafa o Le Alii e, le Alii e; a e sili atu ai pe a faia, faatino ma faataunuu lona finagalo, tusa pe faia ma le gūgū ma lē leoa.

### ALU I LUMA pe NOFO I LE SONE SAOLOTO

“16 Aua e te finau ia te au ona ia ou tuulafoai ia te oe, ia le mulimuli atu ia te oe; auā o le mea e te alu i ai, ou te alu ai foi...” Ruta 1.

O le Tusi ia Ruta o loo faaalua ai le eseese o i latou e laa atu i fafo i le faatuatua ma tagofia tulaga e le o iloa, tainane ina e lamatia ai le ola, ma i latou e pulea e le fefe, e faaeteete ne’i afaina, ma latou misia ai faamanuiaga o saunia ma mea sili o faatali mai e le Atua. E amata le tala, ia Elimeleka le Peteleema, o lona toalua ia Naomi ma atalii e toalua ia Maalona ma Kilion, ua latou o atu i le nuu o Moapi. Sa le’i umi ona sologa lelei a e taia loa e puapuaga. Na maliu muamua Elimeleka, ona tuua lea na o Naomi ma ona atalii e toalua. Na laua faaipoipo atu i fafine Moapi, o Orepa ma Ruta, ona maliliu ai lea o tama. Na faatumulia Naomi i le tiga, ona filifili lea e toe foi i lona nuu o Peteleema, ma na fautuaina avā a ana tama e nonofo pea i lo latou nuu o Moapi, e faatali ai mo ni a laua tane.

Ma o iinei na iloa ai le eseese o nei tamaitai e toalua. Na filifili Orepa e nofo pea i Moapi e ui ina o se nofoaga o tiga e le toe galo. Aisea? Auā o le nofoaga na ola a’e ai, na te masani lelei ai. O lona lea sone mafana. Sa le’i i ai le faatuatua e alu atu ai i luma. A e sa le’i faapea Ruta. Na ia fai atu ia Naomi, “*O le mea e te alu i ai, ou te alu ai foi; o le mea e te nofo ai ou te nofo ai, e fai lou nuu mo’u nuu; e fai lou Atua mo’u Atua; 17 o le mea e te oti ai, ou te oti ai, e tanu ai foi a’u.*” (*Fa’aaauu itulau 12*)

---

# ***O LE PEROFETA MULIMULI***

---

***(O le Tala Faafagogo ua faaSamoaia mai le tusi, 'The Last Oracle' tusia e James Rollins)***

“Tamā Pepe...”

O le igoa faafagafao mo Iosefa Menegele, le tagata Fasimanu o Auseuiti.

Na ia tago atu i le lima o Sasa, na lāvea ai ma pa’ū ese le masini o faatonutonu ai le toto maualuga.

Leai, na ia tautō atu ai ia te ia. E lē toe faia lava e oo i le faavavau.

Na punitia lana vaai i ona loimata.

Na pii mau atu tamatama’ilima vaivai o le teine ia te ia. O ona laumata sa emoemo. “Papa...Papa Iuri...?”

“Ioe,” na ia musumususu atu ai. “O a’u lea, pepe. Ou te lē tuua oe.”

Na minominoi ona laugutu a o ia toe taatia ifo ua moe. Na faavaivai ona tamatamailima ma mamulu ese mai lona pipii atu ia te ia.

“Marata...O Marata o loo fefe.”

11.50 afiafi.

Atumauga Urale i Saute.

O le tino o loo mafanafana pea, a o le toto sa maluluina.

E tusa o le itula talu ona fasia.

Na si’i ese mai e Lutena Posakova lona alofilima mai le autafa o le taika mate. Na ia tago atu i le ulu, uu le taliga ma toso a’e i luga. E tutusa ma le isi taliga, o loo faailoa ai o le taika leni o Akati. Na ia toe faapalasi ifo i lalo le taika a e tu i luga. I le isi ona lima, na uu ai e Posakova lana tamai fana, o le ituaiga Iarikina PYa. Na ia faalālā i luga, ma moomoo maimau pe ana o utu i se pulu e malosi atu nai lo le 9 milimita. Na ia su’e solo Sakara. Sa le’i i ai se faailoilo o le pusi.

O ona tua atu, sa asu a’e ai pea le faleoo ma toulu i lalo ua malepe.

Na mafaufau Posakova ma le ofo i le solaaga, a o ia toe foi atu i le vaalele sami. Na tutū mai ai le pailate ma ni fitafita se toalua, e tofu ma le fana, o vaavaai mai e puipui ai o ia. Na mumū mai le moli taumua o le vaa mo vaivai tuia ai le pogisa. Na taavili malie le ili lapo’a i tua o le vaa, a o faaola e le pailate le afi o le vaa.

Na oso atu Posakova i luga o le vaa ma talo atu lona lima latou te o atu i le lopala i le pogisa. Na ola le afi, taavili le ili, ma latou toe foi ese mai

toega o le faleoo o tagata tuli manu, agai atu i le pouliuli o le po. E ono faigofie atu la latou sailiga pe ana latou fa’aaoga sulu lanu mūmū e malolosi ma masau, po o mea vaai o le po, peitai na maua e Posakova, sa i ai tagata na latou osofaia le fale e teu ai meafaigaluega, i nai aso talu ai, ma faaleaga uma mea sa i ai.

A le o le Amerika, o lona uiga o tamaiti.

Na latou iloa lava o le a sailia ma tulituli tatao i latou.

“E le tatau ona tatou lipoti atu i le Taitai sili o Matova?” na fesili atu ai le Faatonu Lagolago a o ia tago atu i le uaealesi o le vaa.

Na lūlū le ulu o Posakova.

E lē talia gofie e le Taitai sili ni faaletonu.

Na alu atu pea le vaa i totonu o vaivai lopala.

O le a ia valaau i ai pe a oti le Amerika.

A o latou felelei atu, na toe tepa atu i tua Posakova i le motu, i le faleoo mu ma malepe, ma le taika ua mate. Na ia faaata i lona mafaufau le Amerika ma le mea ua ia ausia.

O ai leni tamaloa? A o fea na ia maua mai ai le atamai ma lona agavaa e tau ai?

6.02 afiafi

Uosigitone.

Na sii a’e i luga e Tereni Makepalai le telefoni i lona taliga. Sa latou faatagaina o ia e fa’aaoga se telefoni o le fale ma faapipii atu lana valaau i le ofisa o Mapeletope. Sa le’i i ai se manatu o Tereni o lana telefoni o le a tumaoti. E mautinoa e i ai se tasi o faalogologo ai.

A e sa le’i taofia ai o ia mai lona valaau mo se lipoti.

O le mae’a ai o se faafeiloaiga i upu mamafa ma Mapeletope, na fai atu ai Tereni, “E foliga mai e ono ola le teine.”

Pe ana fai ua oti, e leai se mafuaaga e fa’aaau ai.

“Ua lelei tele,” na tali atu ai Mapeletope. Na sosoo ai ma se malologa puupuu a e taua; ona ia toe fai atu lea.

“O le a le umi e faamautinoa mai ai?”

Na siaki e Tereni lana uati ma saili pe fia le taimi na te manaomia. “Ina ia mautinoa. E ono itula,” na ia fai atu ai.



---

O le ogatotonu o le po.

O le a aafia ai fesootaiga, peitai latou te maua ai o mea uma.

Na gugulu Mapeletope i lona faamalieina. “O se tala fiafia tele lena.”

6 Setema, 11.04 afiāfi.

Punitapu, Initia.

“E le mafai ona tatou saga o atu i luma,” na fai atu ai Api Panetee.

Sa le’i finau Karai. O uili o le taavale ua matuā gogoto i totonu o le lopala. Ua lagona le vaivai, o ona neura ua malō pei o uaea o le piano, ona ia ave lea o le taavale i luga o se maupu’epu’e gaoā. Mo le lua itula talu ai, sa mamafa ai timuga. Sa le’i mafai e ao o le lagi ona taofiofi le tele o le vai. Na latou tuua le toga mago i le tolu sefulu maila talu ai ma taavao solo ai i le togavao e tele i laau, a o le fanua lenei e laulauā. O atumauga ua latou faaavanoa laufanua mo a’ega o ma’a tifatō ma tofē. O mavaevae uma na tutumu i timuga ma fetafea’i solo i le laufanua. E peisea’i ua tutulu le lalolagi atoa.

A o le mea sili ua avea le mamafa o timuga e malemo atu ai ma helikopa. Ua fiu le au tutuli ua leiloa la latou manu sa tuli i totonu o le afe eka o gaogaosā. Sa iloa lelei e Api le laufanua iinei ma na ia taitai i latou i le auala tifatō, e ulufafo mai togalaau agai i totonu o lenei vaega lē saogalemu. E leai se tagata e sau iinei, na fai mai ai le tamaloa. E le lelei mo se faatoaga.

Ma o se faaupuga faatauavaa lena upu.

“E le o toe mamao,” na faamautinoa atu ai e Api a o faatu e Karai le taavale. “E lē toe atoa se kilomita. A e tatau ona tatou savali atu iinei.”

Na faalafi e Karai le taavale i lalo o lālā o laau paniani. Na tape le afi, ma ia autilo atu ai i fafo i tofē papa ma faata le malumalu Eleni o i luga o le tupe siliva. Na fai mai Api o loo i ai le fale faapena i totonu o laufanua nei. O le nofoaga lena sa aga’i i ai Fomai Poleki i le aso na leiloa ai o ia. Na o se toaititi tagata o le nuu latou te iloa le nofoaga lenei. O se nofoaga sa faamamalu ma matata’u i ai tagata o Api, o le laueleele e paia i le akuta.

Aiseā na sau ai Fomai Poleki iinei? O le a se mea sa faaosofia ai le polofesa?

Na tafe ifo le vai i le tioata o le taavale, na nenefu ai le vaaiga.

“Manatu e sili ona tatou faatali se’i feoloolo le tau,” na fai atu ai Matesone. “Tatou te saili ai le malumalu pe a laofie.”

Na siaki e Karai lana uati. Ua lata i le vaeluaga o le po. Na te le’i manao e latalata mai iinei i le taeao. Pe a aulia le taeao, e o mai helikopa e toe su’e i latou. O le a faigofie ona iloa ma maua le latou taavale pei se tanetau i atumauga laolao. Ua uma ona tapena e Karai fuafuaga, ma tape uaea ma ki e faasino ai le auala, i lona fefe o le mafuaaga lea na iloa ai i latou e le au Rusia ma mulimuli mai ai mai Teli.

Sa tele anoanoa’i ana fesili e le’i mafai ona tali i lona ulu, peitai na ia iloa le mea e tasi ma le mautinoa. Pe afai latou te manana’o e saili le auala na savalia mulimuli e Fomai Poleki, o le taimi sili lenei ona fetau e fai ai.

Na ia liliu ane ma fai atu i le pasese. “O le a ma o ma Api. A e lelei ona outou nonofo pea ma faatali atu i le taavale.”

Na sii atu le lima o Elisapeta. “Tatou te o. Afai o i ai se malumalu leiloa i lenei mea, atonu o le a outou manaomia la’u fesoasoani.”

Na luelue le ulu o Koualasaki. “Ma o le mea e alu i ai o ia, ou te alu ai foi.”

Na tilotilo atu Elisapeta ia te ia i le vaai na amata i le matamataita, ae na liua e avea ma mea e lē mautinoa.

“E tatau ona tatou o faatasi,” na fai atu ai Rosauo, a o ia tago atu lulu’u mai a latou ato.

Na luelue le ulu o Luka.

O Matesone na faataavale ona mata. “E foliga mai o le a tatou faatimu uma.”

Ua mautu le tonu ona latou ulufafo lea mai le taavale ma faaputu atu i le timuga. E le’i umi ni laa a e taele atoa Karai, o ona ofu ua faaopoopo le luasefulu pauna le mamafa.

Na tomumu Koualasaki ma toe autilo moomoo i le taavale, peitai na minoi loa Elisapeta ona faapena foi lea ona mulimuli atu ai o ia.

“Tatou o atu i le itu lea,” na fai atu ai Api a o ia faasino atu i se papa faatū na ea a’e i se tumutumu mafolafola na tumu i laau. Na tautau ifo o latou a’a mai puipui o maaoneone, sa pei ni foliga masoasoa o ni tamaloloa matutua, na fausia i timuga ma le savili. Na feemo uila o le lagi ma pā faititili. Ua faateteleina le afā.

O le vaivai ai o ona ponai, na amata ai ona masalomia e Karai ana fuafuaga. Talu ona latou tuua Teli i le taeao, na te le’i mafai ona

---

faafesootai le Sikima. Na leiloa le telefoni a le latou vaega i le vevesi sa tupu i le faletalimalo. O le telefoni totogi muamua na ia faatau i Teli e lē ola i lenei vaega laueleele tu mamao. Ua na o i latou. Ma e ui ina masani Karai i le galue aunoa ma le tele o nisi, a e sa i ai tagata lautele e tatau ona ia manatunatu i ai.

Na faasaga atu Api i se avanoa vaapiapi na ui atu i totonu o le papa. Na toulu ifo ai se vai i lona ogatotonu ma tafe ese atu. Sa tuaoi ai se auala vaapiapi, ma puipui na ea a'e i ona itu. Na mulimuli atu Karai ia Api i le auala. O totonu o le ana, na faaitiitia timuga, ina ua poloka le savili. A e na maligi ifo pea le vai i puipui. O le gogolo o le ālia, na maileia i totonu o le ana, sa faateteleina.

Na latou fa'auau pea i le laina e tasi.

Na fepi'opi'oa'i le vanu e pei o se faititili'emo, na faasolo ina vaapiapi ma uumi a o ui atu i aega maualuluga. Na faamatala e Api a o latou savavali. "O lo matou nuu sa tele taimi na tumuli mai ai iinei i taimi o sauaga. O le tamā o lo'u tamā sa ia faamatalaina tala e uiga i fasiga na faatama'ia uma ai nisi nuu. O i latou na sosola na sulu mai iinei e lalafi ai."

E lēitioa taofiofi nanā lilo e akuta lenei nofoaga, o le mafaufau lea o Karai.

"Peitai e leai se malu puipuia e mautinoa i nei puipui," na faaopopo atu ai Api. "E lē lilo e faavavau."

Na tilotilo atu Karai ia te ia, peitai sa sitepu atu Api i luma i le mea na vaelua ai le auala i magaala e lua. Na faasosolo atu le lima o Api i le puipui o le tasi itu, e pei o loo fia mautinoa o i ai se mea, ona ia toe fa'auau ai lea i le itu agavale.

Na tuu atu tamatama'ilima o Karai i le mea na faasosolo ai lima o Api. Sa i ai tusitusiga i le puipui, na tau lē iloa atu i le timu, ua na o ni ataata i luga o le papa.

Na iloilo latalata atu Elisapeta i ai. "Arapana," na ia fai atu ai, ua te'i, ma faataupupula i ona autafa. "Mata ua tatou i ai nei i pito autafa o le Vanu Initusi. E i ai se faigamalo tele na aveia iinei mo latou nofoaga."

Na lue atu le ulu o Matesone e lagolago ma faamaonia. "O tagata Arapana na nonofo i autafa o le Vaitafe Initusi i le lima afe tausaga talu ai, na latou tuua ai toega o aai ma malumalu uiga eseese na faatafunā'iina. Tou te maua solo i latou i soo se vaega o le laufanua. Atonu o la tatou uo Initū

talavou na ia sesē ai i se tasi o malumalu faaleagaina o Arapana, faapea o le malumalu lena o loo lolomi lona ata i le tupe siliva tulaga ese." Na fa'auau atu i luma Karai. "Na o le tasi le auala e saili ai."

O le te'a atu o isi pi'oga e lua, na faafuase'i ai ona va tele le vanu i se ipu faaofuofu ititi. Na toulu ifo i ai le vai i le itu mamao atu, faapalasi ifo i se papa puupuu aga'i i totonu o se vai na fafagaina atu le alia na latou mulimuli ai.

Na tu Api ma talo atu lona lima i le ipu faaofuofu. "Ua tatou taunuu iinei." Na faasenunui mata o Karai. Na gaogao le vanu – ona emo mai lea o le uila ma sulua ai ma le iila le vanu. O le malamalama siliva na faata'ele ai le papa ma susulu atu i le ogatotonu o le vai.

O autafa atoa o le ipu faaofuofu, na eli ai i puipui maaoneone ni vaega togitogi. O laasaga taitasi na latou faamalumalu ifo ia malu ai ni aiga sa i ai. Na latou a'e mai le fola seia taunuu i lau sa tautau mai luga o le vanu. Sa i ai vaega o aiga na toulu ese mai le tele o tausaga ma aveia ma papa ma maa. Na faamanatu ai ia Karai aiga sa nofoia papa o Initia Anasasi. Peitai mai le mamanu o fausaga, e leai se Initia – pe o Initia Amerika po o se tagata o Initia – na latou fausia nei nofoaga. Na laa atu i luma Karai ma liliu faataamilo. O foliga aupito mai i luma o fale o maa papa'e, tulaga ese mai maa uli o isi vaega. O papa sa fausia i maaoneone tau vaivai, ua loa senituri o oloia ma afaina i le timu ma le savili. O nei fale e foliga mai na tutupu sa'o a'e lava mai puipui. O maa mapu papa'e na faamanatu ane ia Karai auivi o tagata na onono ane mai foliga o se papa. E ui ina pei ua folo faa'afa e papuipui na liua i afā, a e sa iloa lelei atu lava vaaiga o faavae o nei fale. O taualuga maualalalo faatafatolu na lagolagoina vaega eseese. O faatagata ma isi mea faitino sa vaneina, ua leva tausaga o timuia ma laina, sa faatutū ma taatitia solo e teuteuina ai fale. Sa le'i taumateina le puna o nei fausaga.

"E faaEleni," na fai atu Elisapeta ma le ofo. Na ia vaavai solo, a o tafe ifo vai mai ona foliga. "O se fausaga o malumalu lavelave faaEleni. O loo natia iinei." Na tu ai Matesone i ona autafa. Na uu lona pulou i lona lima ma selu ona tamatama'ilima i ona lauulu papa'e na susū. "E ofoofogia. Atipale, lou vale matua, sa tatau ona e ta'ua mai ia te a'u..."

---

Sa faapea foi ona faamaga le gutu o Karai i le ofo, o lona maofa na aveese ai lona vaivai.

“O se malumalu lena i le tulaga tuufaafegai, o se tasi o fausaga aupito faigofie i le faaEleni. I le itu atu lea o i ai se fausaga e mamanu i sikaili o tausaga mulimuli mai. A e silasila atu i le faataatiaga faalapopototo o isi atufalega. E tatau ona faailoga ai se tolo, se malumalu faalapopototo, o tanumia i totonu o le papa.”

A o ia tautala, a o Karai sa tulimatai i lana vaai se fausaga i le itu mamao atu o le faaofuofu. Na ta ta saosaoa lona fatu. Sa taatia mai ai se malumalu e ‘afa ona foliga i luga o le papa. Sa foa ai ni alā tetele i ona lalo, o faailoga ai le vaega o le vanu na pa’u atu ma tata’e ai. Na maligi sisina ifo le timu i le itu i luga o le ta’e ma tafe ifo i luma o le malumalu, ma ave’a ai o se vaaiga faafoliga.

Peitai sa leai lava se faafesiligia.

E ono atufalega na lagolagoina se taualuga faatafatolu ma ave’a ma faavaa o se faitotoa pogisa.

“E pei lava o le ata i luga o le tupe siliva,” na fai atu ai Rosauro, a o ia maitauina foliga o Karai.

Na savali atu Ape agai i le malumalu umi. “E le na o le pau lena.”

I lona faatumulia i le fia iloa, na mulimuli atu ai Karai ma toso atu ai le vaega ua timuia uma.

Na latou taunuu loa i le faaputuga alā, ona sopo atu lea o Api i le isi itu ma tālo mai latou te mulimuli atu. Na ia a’e i luga o maa ma faasolo atu i luga. Sa pei na te iloa se auala e ui atu i luga o le faaputuga maa.

Na latou mulimuli uma atu i le tamaloa Initū i le laina e tasi.

Na fa’auau le talanoaga a Elisapeta ma Matesone. “Aisea na latou fausia ai lenei malumalu lavelave iinei, o le a sou manatu? Ma faia i se tulaga mate gatā?”

“E manino sa latou lalafi,” na fai atu ai Matesone.

“O se nofoaga e matuai faigata tele ona saili ma maua, aemaise o loo tanumia i lalo o nei papuipui. Peitai na ou vaaia ni fausaga faapea e tautau ifo ona vaega ma teuteuga, i nofoaga faatafunaiina o Harapana e maototonu i Vanu o Initia. Atonu o nei tufuga faufale na latou aumai se nofoaga faatafunai tuai o Harapana, ma latou toe teuteua ina ia fetau lelei mo latou mana’oga.”

“E ono sa’o lena mea. O le tulaga masani lena i nisi auga tupulaga ma faiga malo, latou te fausia a latou faigamalo i luga o faavae a nisi.”

A o laua talanoa, na pulato’a Karai i le malumalu. Ina ua latalata mai, na vaaia ai e Karai o mea sa ia manatu o ni ataata uliuli i luga o atufalega mapu, a o faailoga na o ni mu ua leva. Na aliali manino mai auiliiliga. O ta’eta’ei ma mavaevae na togitogi ai le laualuga; o se vaega tele o le pito i luga na malepe ma pa’ū ese.

Na masalo Karai o le faaleagaina lenei e le’i mai le tele o tausaga o taatia. E foliga mai sa tau se taua tele iinei.

O luma atu, na oso ese ai Api mai le papa sa pito i luga ma a’e atu i le va o pou e lua. Na sosoo atu ai ma Karai ma faamimigi i luga o le fola maa mapu, ua te’a ese ma le timu. O vaegafale lagolago e ono na taatia mai tusa ma le iata mai le maota i o latou lumafale, na fausia ai se polotito laititi.

Na ia tu i luga e faaavanoa mo isi. O Koualasaki ma Luka na fesoasoani ia Elisapeta ma Matesone.

Na mulimuli alu atu Rosauro, ma le avega faafafa.

O le aofaga potopoto uma ai, na agai ai Karai i le faitotoa, a o Api na tootuli ifo e fai lana tatalo.

Na faatautu Karai, o lona manatu afai e fai foi sana tatalo o lona uiga ua ia soli tuaoi.

Na tu Api ma lue lona ulu.

Na tago ane Karai i se tama’i mōlī uila ma ki. Na ia ulufale muamua, o lana mōlī na mu saesae i totonu o le pogisa.

O le potu e telē ma e sikuea lelei, e luasefulu futu i ona itu faapea lona maualuga. E tele nisi vaega na laina i autafa o le puipui, o nisi na vaevae ninii i nutiga. O le ogatotonu o le fola sa i ai se matāafi, na matua uliuli patoi. O ona itu, sa i ai ni avanoa faaofuofu sa ui atu ai i potu i ona itu, e pei o potu tatalo o malumalu.

Na maitau atu e Karai ni faaputuga i potu laiti. Na ia sōsō atu e autilo atili a o ulu atu isi i le malumalu. O Api na tausisi i le itu, o ona lima na piilima ma le gatete. Na te le’i mulimuli atu.

A o faasino atu e Karai lana moli uila, na ia malamalama ai i le faatautū o le tamaloa Initū. O le potu sa faatumulia i ponaivi, na faaputu pei o ni ogalaa, a e pito i luga ulupoo e faitau selau. O ivi uma o tagata. Mai foliga pala ma lanu sasama, o nei auivi ua au tupulagā. Na vaaia e Karai ata ma faailoga o mea na susunuina i luga o atu falega.

*(soso’o atu Sulu Samoa Me 2024)*

---

## **NA O AFIGA E TULEI ...**

*(mai le itulau 7)*

Na nofo Orepa ma na misia faamanuiaga, a e na alu pea i luma Ruta, ma tauia ai o ia e le Atua. I Peteleema na la'ua feiloai ai ma Poasa; e le gata o se mauoa, a o se tamalii e alofa i le tagata ese, pei o le alofa o Ruta ia Naomi. Na tuufaatasia e le Atua nei ituaiga alofa tutusa, ma laua fanaua se tama tane na tupuga mai ai le tupu o Tavita ma isi tupu toatele, aemaise le Tupu o tupu. E tauia e le Atua le faatuatua, a e le o le fefe. O le mea lea, ia tatou loto tetele e vavae ese mai le tuanai, a e o atu pea i luma.

### **ALU ESE MAI LE PITO FANUA**

*“22 A outou selesele foi le seleselegasaito i o outou fanua, ‘aua le faauma ou pito fanua pe a e selesele i ai; aua foi e te ao ni fua e pa’u’ū i lau seleselega, a ia tuu mo e matitiva ma le tagata ese; o a’u o le Alii lo outou Atua.”* *Levi.23.* Ina ua iloa atu Ruta e Poasa i totonu o lana faatoaga, ona ia valaau atu lea ia alu ese o ia mai le pito fanua, a e alu ane i le ogatotonu o le faatoaga. Na faatonu foi e Poasa lana aufaigaluega ina ia agalelei ia Ruta, ia faato’ulu nisi fusi saito i le fanua ina ia ‘aua le tigaina Ruta e selesele (Ruta 2:16). O i ai se feau taua iinei. E alofagia oe e le Atua i sina taimi itiiti, a e te selesele ai ma le olioli i lou olaga atoa. Ma na te faia e tauala mai nisi tagata e te lē iloa, a ua uma ona Ia tapena ma saunia. Sa le’i iloa e Ruta ia Poasa, peitai ona o Poasa e aiga ma Naomi, na agavaa ai Poasa e tauave le tofi o Elimeleka ma ona atalii (3:1-9), ua i ai lana aiā tatau e totagi ai aitalafu, ma tausi lelei i ona manaoga o le soifuaga. Ua fetalai Iesu, *“4 O lou Tama foi, o Le silafia i le mea lilo, o Ia lava na te avatu se tauia ia te oe.”* *Mata 6.* Atonu e le o iloa e le toatele o tagata, a e mautinoa e lē lilo i le Atua pe faagalo oe ma lou agalelei. *“10 Auā e le amioletonu le Atua, na te faagalagaloina la outou galuega ma le alofa ua outou fa’aali mai ai i lona suafa...”* *Eperu 6.* E i ai le aso e fetalai atu ai le Alii ia te oe, ina ia e alu ese mai le pito fanua, a e sau i le ogatotonu o Ana faamanuiaga.

---

## **LUPEMATASILA SA**

### **MATAI’A MOEFILI A.F.**

**1/12/1959 - 1/10/2023 (63+10+1)**

O le susuga i le A’oa’o Fesoasoani o le EFKS Palmerston North, Pulega Ueligitone i Matu, Matagaluega Laumua o Aotearoa i Niu Sila. Na soifua mai o ia i le Aso Lua, 1 Tesema 1959 a e na valaau e lona Matai ma faamanavaina ana feau i le Aso Sa, 1 Oketopa 2023, ua atoa ai le 63 tausaga 10 masina ma le aso e tasi o lona soifua. O ona tua’a, o lona tama o Moefili Faletua Siania (ua maliu), a o lona tina o Vulutasi Mariana Moefili. Na faaipoipo atu o ia i le faletua ia Tusigaigoa Pili Moefili. E to’a sefulu isi ona uso ma tuafafine, ua maliliu le toatolu.

O le susuga i le A’oa’o Fesoasoani ia Lupematasila Sa Moefili, o se auauna galue lelei a le Alii i totonu o Lana Ekalesia. E tele ni tausaga sa avea ai o ia ma Taitai Pese Tama o le Aufaipese, aemaise o ia o se ta laau ma le faipese faamoemoeina. E tele foi ni tausaga sa avea ai o ia ma Peresetene o le Aualavou, aua e fiafia le tupulaga i lana taitaiga, aemaise ana taleni agavaa i taaloga e pei o le kirikiti faaSamoa. E oo mai le valaau a lona Alii o avea o ia ma Teutupe a le Mafutaga Tama. O se uso a auauna sa tautua malosi ma le loto fiafia i le Ekalesia a Iesu Keriso sa pele ia te ia. O se auauna faatuatua ina ma lima mae’a pei ona molimauina foi e le Pule o lana galuega.

O lona sauniga faaleaiga sa faia i le Aso Tofi 12 Oketopa 2023, na taitaiina e lana Feagaiga Periti O. Fauolo FS. Na molimauina ai lona soifua e le toatele o fanau, aiga, uo ma ana paaga. O lona toe sauniga sa faia i le Aso Toonai, 14 Oketopa 2023 i le malumalu o lana Ekalesia pele. Na taitai le susuga Toeaina Aufaga Faafia Maualaivao FT, lauga Elekana Tuialii FS, tatalo Meki Lauvi FS. Na molimau Suitupe Moefili ma Nusipepa Moefili fai ma Sui o le fanau, o le faletua ia Tusigaigoa Pili Moefili, o Toluono P. Leauga na fai ma sui o le aiga, le susuga i le Taitai o le sauniga, faapea Periti O. Fauolo FS. Ona faaii lea i lona oliolisaga tumau i Kelvin Grove, Palmerston North. *“Le auauna lelei e, ma le faamaoni, ulufale mai ia i le fiafia o lou Alii.”*

**Saunia: Susuga Periti O. Fauolo FS**

**EFKS Palmerston North,**

**LAUMUA O AOTEAROA.**

---

# ***O E UA FAI I LAGI FOLAUGA***

---

## ***GALUVAO UILI ISARA AF***

***21/3/1972 – 11/3/24 (51+11+20)***

O le susuga i le A’oa’o Fesoasoani EFKS Tanoalei’a, na soifua mai le Aso Lua, 21 Mati 1972, a e na valaauina e lona Matai i le Aso Gafua, 11 Mati 2024. Ua 51 tausaga, 11 masina 20 aso le matua o lona soifua. O ona matua o Peseta Sinave Isara le tamā ma Miriama Galuvao Isara le tina. Na faaipoipo atu ia Mutaaga Faamanatu Isara i le tausaga 1994. E toatasi lo la’ua alo, le tamaitai o Xiaomei Isara Aofia, e toalua fanau a fanau. O lona soifua a’oa’oina na amata mai Savaii ma faasolo mai ai i Apia, ma maua ai lona avanoa e faasikolasipi ai i Niu Sila, i le Iunivesite o Aukilani, faapea foi le Iunivesite i Saina. Sa galue Faafaia’oga, o le Ofisa o Tupe Maua, Ofisa o le Falema’i, Ofisa o le Pulega o Malae Vaalele, o le Pulega o Uafu, ona faai’u mai lea o lona soifua galue i le Ofisa Tutotonu o le EFKS i Tamaligi, na fai ai o ia ma Pule o Fale Mautotogi o le Ekalesia i le 2022. O lana galuega mulimuli lea na faamavae mai ai ina ua gasegase, se’ia oo ina valaau le Atua ia te ia.

Sa avea ma tiakono i le EFKS Tanoaleia i le tausaga 2004, a o le tausaga 2013 na faamanuiaina ai i le tofi o le A’oa’o Fesoasoani ma auauna mai ai lava seia oo ina faamanavaina e le Alii ana feau. Sa faapea foi ona fai ma usufono i le Fonotele i Malua i le tausaga 2017, i lona tofi A’oa’o Fesoasoani. Sa ia auauna i le Ekalesia o le Faia’oga A’oga Aso Sa, o le sui o le Aufaipese, o le Autalavou, faapea foi le Mafutaga Tama. O se tagata faamanuiaina e le Atua lenei tagata, auā o meaalofa o le potu ma le atamai, sa mafai ai ona mau galuega lelei, a e faapea foi i le tele o isi ana taleni e pei o le fatuina o pese, ma usu, e lelei i le musika. O le tagata e tupuga mai le aiga faipese iloga o le atunuu, i fatuga faaSamoa. Sa ia fatuina le pese o le atoaga o le 50 tausaga o le Aulotu EFKS Tanoaleia i le 2016, sa faapea foi i le pese faaSamoa o le faafiafiaga a le Matagaluega a Apia Sasa’e, i le Fono Tele 2021. Sa ia matuā fa’aaogaina lelei lea taleni, mo le Aulotu i Tanoaleia e ala i le faiga o tala o le Lotu Tamaiti,

o Aso Sa Tina ma Aso Sa Tama, aemaise o le saunia o tala ma pese mo Mafutaga a Autalavou o le Pulega a le Vaimauga Sisifo. O le tausaga 2014 na ia tuufaatasia ai se Koneseti sa faautū i le mafaufauga, “UA LUTIA LE ANOFALE O AIGA”, o le tala i le tupu o Tavita ma mea na tutupu i lona aiga. O se matati’a lea i lo’u manatu e lē mafai ona toe ausia.

O lona sauniga faaleaiga sa ta’ita’i le susuga Mose Galuvao FS, o le faafeagaiga EFKS Vailuutai. Sa faatumulia lea aso ma sa molimau le usoga, aiga, uo ma e masani, o le tagata fai aiga lelei, osi aiga. Sa molimau foi uo ma aumea mamae, o le tagata ola fiafia ma tausafia. O le tagata sa fiafia i taaloga, auā sa taalo lakapi, sa mafai foi ona avea ma faia’oga i au lakapi e pei o le au lakapi a Vaivase Uta.

O lona toe sauniga sa faia lava i lana Ekalesia pele, le EFKS Tanoalei’a. O a’u sa ta’ita’i, o le susuga Iese Uele FS sa molimoli maia lona sa i totonu, o le susuga Siaoisi Salesulu FS sa faitauina le Tusi Paia, o le susuga Ionatana Teo FS sa tatalo, a o le susuga Semikueva Faatoafe FS na saunia le lauga. Sa molimau Mutaaga i le la mafutaga, o Xiaomei Isara mo le fanau. O lona uso le afioga i le Teutupe a le Ekalesia Aoa, susuga Melepone Isara FS sa molimau mo le usoga, o Asiata Fa’aaliga sa molimau fai ma sui o aiga o Mutaaga, a o Galuvao Valma Galuvao sa molimau fai ma sui o aiga o le tamā ia Galuvao. O a’u sa molimau i le soifua faaleagaga o le uso.

*“E, ua maliliu toa, ua maumau ai auupega o le taua.”* Ona sosoo ai lea ma sauniga i lona oliolisaga tumau i lona aiga i Tanoalei’a, ma faatofa atu ai i le uso i le pese, Talofa uso e, tofaina oe, ua sau le itupo e malolo, E ala oe pe a mavae le po, Tofa, Tofa, Tofa. Manuia lau malaga uso, tatou toe feiloai i lena taeao matagofie.

***Saunia Susuga Enefatu Lesa FT,***  
***EFKS Tanoaleia,***  
***Pulega Vaimauga Sisifo,***  
***MATAGALUEGA VAIMAUGA.***

---

# TUPUOLA TUSA AIONO

## MISI TUPUOLA A.F.

(31/1/1952 - 9/4/2024 (72+2+10))

O le afioga ia Tupuola Tusa Taofitau Aiono Misi Tupuola, o le A'oa'o Fesoasoani o le EFKS Matautu Falealili, a o le Failauga Faamaoni Penisione o le Ekalesia Metotisi i Talimatau. O le sui faau'u o le Malua Bible School i lona faailoga o le Diploma. Na fanau mai o ia i le Aso Tofi, 31 Ianuari 1952 i ona matua o Tupuola Misi le tama (Matautu & Saleilua Falealili, Safotu), ma Halaevalu Tupuola le tina (Fasitoota). Na faaipoipo atu o ia i le tamaitai tausifua faauuina o Asomaliu Nakiso (malu 20/02/21) o Salelologa, Sagone ma Taga. E to'a 6 le fanau, 20 fanau a le fanau, 2 fanau a fanau a le fanau. O le ulumatua o Theresa Kini Ulu Kini (Tausi Matagaluega Metotisi Salepou'a'e) a o le lona lua o Naoafioga Piilua Sao Fereti, (o le Faafeagaiga EFKS Lepuia'i Manono). Na a'oa'oina i le Tulaga Lua, Itumalo & Leulumoega Fou. Na maluu o ia i le Aso Lua 9 Aperila 2024, ina ua atoa ai le 72 tausaga 2 masina ma le 10 aso o lona soifua.

Na galue o le Malu o le Malo i le Matagaluega o Leoleo ma Falepuipui. Na galue i le Ofisa o Fela'uaiga Laueleele LTA, o le Ofisa Sili Lagolago & Failautusi Komiti Faatonu LTA. O taimi o lana auunaga na fai ai nisi suiga tetele i mataupu tau taavale - lanu papa'e o taxi, suia o taavale foeli itu taumata, suia itu e o ai taavale, faia o patupatu i auala tele. Na iloga le tele o tupe maua a le malo ina ua sui atu le pasiga ma laisene o taavale mai le Ofisa o Leoleo i le Ofisa o le LTA. Na filifilia e avea ma tofi Faipule o le itumalo Falealili i le palota 2011, o le paeaiga lona 15 o le Palemene o Samoa. Na avea ma Minisita Lagolago o le Matagaluega o Galuega Tetele. Na fai ma sui o le Komiti Faatonu o le Pulega o Vaalele a Samoa, ma le Taitaifono Komiti Faatonu o le Faalapotopotoga Toomaga mo e Puapuagatia.

O le Aso Sa 21 Aperila na auai atu ai lona sa, i le sauniga lotu masani o le taeao a le Ekalesia Metotisi Talimatau, na ta'ita'i e le Tausi Matagaluega ia Luteru ma molimau ai le soifua

tautua o Tupuola e sui o le Matagaluega. Na toe momoli atu lona sa i le Maota Faasausau o Letoa Sefo Pa'u i Motootua. O le aso 25/4 na aveese ai lona tino maluu mo lona aiga i Matautu Falealili, i se sauniga lotu puupuu na ta'ita'i e lana Faafeagaiga susuga Amosa Vaetoeifaga FS. Na taunuu i Falealili ona faia lea o le sauniga i le malumalu EFKS Matautu, na ta'ita'i e Vaigafa Paleono FS (EFKS Vaovai), ae tatalo Pinofoga Jeremiah AF.

O lona sauniga faaleaiga na faia mulimuli ane 2.00pm i le malumalu. Na ou ta'ita'i, fai le molimau auala atu ai ma le upu faamafanafana, sa matua i le Mataio 11: 28, *"Ia outou o mai ia te a'u, outou uma o e tigaina ma mafatia i avega, o a'u foi e malolo ai outou"*. O atagia ai le alofa faaTupuola, o le tupu na ola ai i matou i aso leaga. O le susuga Rev. Osa Leilua (Tausi Matagaluega Metotisi Pu'apu'a) na molimau foi ma fai le tatalo. E silia ma le 12 isi molimau a le fanau, o aiga ma uo i lea sauniga. E tau fai ioe uma i se tama, se uso ma le tuagane, a o se uo e sili ona alofa faamaoni, i le tausiga o lona aiga, le nuu ma le itumalo, aemaise le galuega a le Atua.

O lona sa na tauaveina e malu o le malo, i le toe sauniga sa faia e le Pulega Falealili, na ta'ita'i le Toeaina Faatonu susuga Tunumoso Soliola Iosia FT o le Sui Taitaifono Fono Tele, faaulufale le sa e Letone Uili FS, Faitau Tusi Paia o Reupena Leau FS, lauga Kolio Sanele FS, ae molimau faaleagaga ma tatalo Amosa Vaetoe FS. Na auai le Ao mamalu o le Malo, Minisita o le Kapeneta ma Faipule o le Palemene. Na molimau le afioga Fofoga Fetalai, Hon. Papalii Oloipola Li'o Ta'eu Masepa'u MP fai ma sui o le Malo e tusa ma le auunaga a Tupuola mo le malo/atunuu.

O Tepatuana'i Uelese na molimau fai ma sui o le fanau, o Pinofoga AF na fai ma sui o le Ekalesia, na ulutala lana molimau, 'E iloga le ti'a e malie, na ona fifimalie', a o Amosa FS na matua lana molimau i le Lauga Fa'aamua, *Amuia e agamalu..loto mama...faatupuina le filemu..o uiga tausaaia uma ia o Tupuola*. Na sosoo ma le sauniga faalemalo, le tula'i fa'aaloalo ma le tauaaoina atu o le tagavai a le Malo Samoa i alo ma fanau.

O le Afioga i le Fofoga Fetalai o le Palemene a Samoa, Hon. Papali'i Li'o Ta'eu Masipa'u, sa fofogaina le molimau fa'apitoa a Samoa aoao, e tusa o le tautua matavela a le Afioga ia Tupuola Tusa Misi Tupuola, e pei ona tautua ai i le Mālō ma Samoa atoa, i le tofiga Faipule mo lona Itumālō Fa'aalalafaga o Falealili i Sasa'e i paeā'iga ua mavae.

I le Sauniga Fa'aleMālō o le afioga iā Tupuola i lana Ekalesia E.F.K.S. Matāutu Falealili, sa auai ai Lana Afioga i le Ao Mamalu o le Mālō Tutoatasi o Samoa, Hon. Tuimalealiifano Vaaletoa Suālavī II, o le afioga i le Fofoga Fetalai, Minisitā o le Kapeneta, Faipule o le Palemene, aemaise āiga, uō ma le Ekalesia. Na saunoa le Fofoga Fetalai e faapea, Sa Faipule le Afioga iā Tupuola i lona suafa Tusa Misi Tupuola. Sa filifilia e avea ma Sui Usufono o le Palemene, i le Aso o 14 Mati i le tausaga e 2011, ma faatautōina i le Aso 18 o Mati i le 2011, ma aloā'ia ai loa le avea o ia ma Faipule o le Palemene i le Paeāiga 15 mai le tausaga e 2011 - 2016. O le Paeāiga foi lea, na seei faatasi ai le afioga iā Tusa Misi Tupuola ma le afioga ia Tuiloma Pule Lameko, i nofoa e 2 o tofi Faipule o le Itumālō o Falealili.

Sa avea ma Minisitā Lagolago mo le Matāgaluega o Galuega Tetele, Fela'uāiga ma Atinae Eese e a le Mālō, na filifilia foi ma Taitaifono o le Komiti FaaPalemene mo Matāupu tau i Galuega Tetele ma Fela'uāiga, a o le Sui mo le Komiti FaaPalemene mo matāupu tau aoaoga, saienisi ma fesootāiga tekonoosi faaneionapo.

I fa'amaumauga a le Palemene o Samoa, o le Aso 20 o Iuni i le tausaga e 2011, na folasia ai i le maota fono lana saunoaga fa'ataupou. Mai i lea saunoaga, sa ia fa'aailoa ai nisi o mana'oga tāua o lona Itumālō, e aofia ai:

\*Le silasila o le Mālō i aiaiga ma tuutuuga o loo faatino ai le galuega a i latou e nafa ma le aoina o tupe a le Mālō.

\*Tele talo fou ua maua i Falealili, peita'i e na o le lua lava auala gālua na fausia e le Mālō.

\*Molimauiina le utiuti o le suāvai maua e le Itumālō o Falealili, a o le soifua mālōlōina e na o le tasi le aso e tatala ai le falema'i i totonu o le Itumālō.

\*Moomia se faamāmā avega mo le au fai fa'ato'aga i Falealili, ona ua lē gafatia le taugatā o mea faigaluega mo le atinaeina o faatoaga.

\*Mo'omia se ta'avale lelei mo le auaunaga a Leoleo i Poutasi.

\*Telē le aafiaga o vai puna ma vai ta'ele a le Itumālō talu ona maea le Sunami.

O le Sauniga FaaleMālō na fesiitai ai e Malu o le Mālō le pusa maliu o lenei tamālii o le atunu'u, ma na ufita'i foi lona pusa maliu i le tagāvai o Samoa, o le fa'aaloalo maualuga lea a le atunu'u, e tu'uina atu i se tasi ua afu lelea lana tautua matavela ia Samoa atoa. O le Fofoga Fetalai fo'i, na ia tau'aaoina le tagāvai o Samoa i le Faletua o le Tausi Matagaluega Salepou'e Saleimoa, o Theresa Kini Ulu, o le sui o alo o lea tamāli'i, e fai ma pine faamau o le amanaia, fa'aaloaloga ma le faafetai faapitoa a Taitai o le Mālō ma tagata Samoa uma, ona o le auaunaga a le afioga ia Tupuola a o soifua o ia.


Na saunoa le Fofoga Fetalai i lana molimau, "E lē tau faailoa lenei tamāli'i, o se tagata e tauagafau, e loto maualalo, fa'aaloalo, a o se tagata foi e toafilēmū ma galue faamaoni, ma e tali lava i le ata, ma si ona siufofoga mālū. O se Sui Usufono e lē femoumoua'i lona finagalo, e atagia lona finagalo i lona loto finau i le amiotonu, auā se manuia o lona Itumālō ma Samoa atoa. Talofa e, i le tōfā sa faufau ai manuia o le Itumālō ma le atunuu, ua māliliu toa ua maimau ai aupega o le taua. Lau afioga Tupuola Tusa Misi Tupuola, faafetai mo lau tautua i le Palemene, ia viia le Atua ona o au galuega sa fai. Ia manuia tele lau malaga."

Ona faai'u lea i lona oliolisaga tumau o taoto ai i le va o ona matua o Tupuola Misi ma Halaevalu, ma faatofa atu ai i le pese, *Talofa uso e, tofaina oe, Ua sau le itupo e malolo, E ala oe pe a mavae le po, Tofa, Tofa, Tofa..E tumau le faamoemoe, ia Iesu ta te toe feiloa'i ai.* Ia manuia lau malaga, le uso peleina. Ia faamaise le Agaga o le Atua i le fanau ma le aiga faanoanoa. Faamafanafanaina foi le susuga Faafeagaiga Amosa Vaetoe FS ma le Faletua ma le EFKS Matautu, tainane le Susuga i le Toeaina ma le Pulega a Falealili.


**Saunia e F. Tolua FS, Faatonu Sulu Samoa.**

# O E UA FAI I LAGI FOLAUGA

*GALUVAO UILI ISARA AF*



*LUPEMATASILAMOEFILI*



*TUPUOLA TUSA TAOFITAU AIONO MISI AF, ma lona sauniga faalemalo.*